

Transferentziak negoziatzeari uko egingo dio Eusko Jaurlaritzak

Madrilgo Gobernuak uste du sei eskumen ezin direla transferitu

Jaurlaritzak uko egingo dio egoera honetan Madrilekin falta diren transferentziak negoziatzeari. Hala ere, Madrilek zerbait eman nahi badu eta Gasteiz bat badator balorazio ekonomikoan ez du «oztoporik» jarriko transferentzia gauzatzeko.


FELIX IRIARTE / GASTEIZ

Gasteizek ez du Madrilekin transferentziak negoziatzen has-teko asmorik. Madrilgo Gobernuak ez du onartu Estatutua garatzeko 54 transferentzia falta direla, eta egoera horretan Gasteizek uko egingo dio negoziatzeari Joseba Arregi Jaurlaritzako bozeramaileak atzo Gobernu Kontseiluaren ondoren argitu zuenez.

Joseba Zubia Garapen Autonomikorako sailburuak azken bi asteotan Madrilekin izan diren hartu-emanen berri —eta ez «negoziaketak», bozeramailearen esanetan— eman zuen, eta Madrilek 54 transferentzien inguruan agertu duen jarrera jakinarazi zuen. Madrilek uste du sei transferentzia (autopistak, ikerketa eta udal hauteskundeak besteak beste) ezin daitezkeela transferitu, Estatuaren eskuduntzak baitira haien esanetan.

Negoziatzen hasteko Madrilek Gasteizko Legebiltzarrak bere egin zituen 54 transferentziak onartzea eskatu du Jaurlaritzak, baina Madrilgo sozialisten erantzuna ez da Jaurlaritzak espero zuena izan.

Aurrerantzean Gasteizko Go-



Madril eta Gasteizko gobernuetako ordezkarien arteko bilerek ez dute emaitzik ekarri.

OLALDE

PUNTUZ PUNTU

Transferentzien sailkapena

Madrilek bost multzotan sailkatu ditu Eusko Legebiltzarrak eskatutako 54 transferentziak:

- 1 ERRAZENAK.** Lehen multzoan hogeita bi transferentzia sartu ditu. Errazenak dira eta urte hauetan negoziatzen saiatu direnak. Madrilen ustez transferentzia hauek berehala EAEnak izan daitezke.
- 2 AZTERTZEKO.** Bigarren multzoan Estatutukoak izan arren, sakonago aztertu behar dira.
- 3 ZAILENAK.** Hirugarren multzoko 16 transferentziak oraingoz «ezinezkoak» dira Madrilen ustez. Transferentzia «zailenak» osatzen dute multzo hau, eta transferentzia gauzatzeko oinarritzko lege batzuk aldatu eta borondate politikoa behar litzateke.
- 4 ESKUMENIK EZ.** Laugarren multzoan lau transferentzia daude. Madrilek eskumenik ez duen transferentziak. Meteorologia esaterako.
- 5 ONARTEZINAK.** Azken multzoan Madrilek onartzen ez dituenak daude: autopistak, ikerkuntza eta udal hauteskundeak besteak beste.

bernuaren jarrera «pasiboa» izango da. Ez dio transferentziak lortzeari uko egingo, baina halaber, ez du negoziatuko. Arregik esan zuenez, Madrilek lehen multzoko transferentziaren bat eman nahi badu Gasteizek ez du oztoporik jarriko, beti ere balorazio ekonomikoarekin bat badator Gasteiz.

Bozeramailearentzat hau horrela gertatuz gero ere, ez litzateke ezer aldatuko. «Traspaso batzuk egoteak ez du esan nahi gauzak aldatuko direnik. Egokierak berdin jarraituko luke», ziurtatu zuen. Jaurlaritzaren ustez negoziazioak 54 transferentzien ingurukoa izan behar du, gero epeak eta egutegiak jartzeko. Arregik, gainera, ez zuen egiaztatu aste honetan Zubia Saavedraren bilduko denik. «Ez dakit bilduko diren», besterik ez zuen esan.



Joseba Arregi.

OLALDE

da, baina onartuta ere, ez-konstituzionala izango dela uste dute buruzagi sozialistek. Rato PPkoak ere antzerako iritzia agertu zuen. «Kanpo arazoak Madril dagozkio, ez da lurralde autonomoen zeregina».

Jaurlaritzak Europako gaiak aztertzeke alde biko batzordea osatzea eskatu du

F. I. / GASTEIZ

Eusko Jaurlaritzako Gobernu Kontseiluak Europako eraikuntzan EAEk izan behar duen zeregina aztertzen duen txostena jorratu zuen atzo. Karmelo Sainz de la Maza Lehendakariak idazkariaren txostenak zeresan ugari eman du, PSE-EE ez datorelako bat hainbat puntutan. Hala ere txostenean azaltzen den Madril-Gasteiz alde biko batzordea osatzeko eskaeran ados agertu ziren sozialistak.

Txostenak helburu bikoitza du Joseba Arregi Jaurlaritzako bozeramailearen esanetan. Batetik Europaren eraikuntzarekin batera agertzen ari diren foro berri

ezberdinen ezagupen zabalagoa edukitzea, eta bestetik, eztabaidarako txostena izatea. Eztabaida ez da amaitu Jaurlaritzako arloan, eta orain, gainera, legebiltzarkideek eztabaidatzeko aukera izango dute. Sainz de la Mazak berak Legebiltzarrean aurkeztu du informea.

Madril-Gasteiz batzordea 1989. urteko kontua dela gogoratu zuen Arregik. Gero, PPk eta PSOEek Autonomi Ituna hitzartu ondoren autonomien askotariko batzordea sortu zen. Jaurlaritzako kideen arteko ezberdintasuna hor dago hain zuzen ere bozeramaileak azpimarratu zuenez: «EAJk indar gehiago eman nahi dio alde bikoari, eta PSE-EEK

bigarrenari. Hala ere biok bat gatz bi batzordeetan lan egiteko».

MADRILGO SOZIALISTEN IRITZIAK

Alde biko batzordea ez da inoiz bildu. Europarekin lotutako gaiak aztertzeke balio behar luke batzordeak, eta nahiz eta jeltzaleek behin eta berriro abian jartzeko eskatu duten, Madrilgo sozialistek entzungor egin dio EAJri.

Carlos Soltxaga PSOEko talde parlamentarioaren bozeramaile eta Alfredo Perez Rubalcaba Presidentziako ministroa, bestalde, EAEk Europar ordezkari zuzena izatearen aurka azaldu dira. Jaurlaritzaren txostenean aukera hori aztertu behar dela agertzen

Gutxienezko lanak finkatu dituzte arlo publikoaren lanuzterako

BILBO

Eusko Jaurlaritzak Administrazio Publikoko langileen grebarako gutxienezko zerbitzuak finkatzan dituen dekretua onartu zuen atzoko gobernu batzordean. Osasun zerbitzuek premiazerbitzuak beteko dituzte, eta baita janari eta medikazio banaketa ospitaletan dauden gaixoei ere. Tren eta errepideko garraioei dagokien maiztasuna laurdenera murriztuko da. Herenegun emandako prentsaurrekoan sindikatuek jakinarazi zuten beraien asmoa zerbitzu hau erabat geldiaraztea zela.

Administrazioari dagokionez, erregistroak eta telefono zerbitzuak betetzea agindu du Eusko Jaurlaritzak. Euskal Irrati Telebistari dagokionez informazio zerbitzuak bederen egin egingo dira.

AUTO KARABANA BILBO

Administrazio Publikoko langileek auto karabana bat egin zuten atzo goizean Bilboko kaleetan zehar. Karabanak trafiko oztopoak sortu zituen erdialdean.

ELA, LAB, CCOO, UGT, SATSE eta EILAS-ek Administrazio langileei bihar lanuztea egiteko dei egin diete, Eusko Jaurlaritzak ezarri nahi duen soldata izoztearen aurka.

Elkarrizketara jotzeko eskatu dio HBk Itunari

BILBO

Gaur biltzen den Ajuria Eneko Itunaren mahaiari «bere ondorioetan ez dadin autokonplazentzia eta ohizko gaitzespenetan gertatu» eskatu zion atzo Jon Idigoresek. Diputatu aber-tzalearen ustez ordua da aski esateko enfrentamendu zibilera eta mendeko politikora deitzen duten ahotsei, eta ekarpen zehatzak egiteko gatazkari aterabidea emateko.

Azken hiru hilabeteko gertakizunak aztertu ondoren «hausnarketa sakona» egin beharra dagoela adierazi zuen. «Hiru hildako komisaldegietan, tortura salaketa iraunkorrak, egunkari baten asalto, heriotzak ekarri dituzten atentatuak eta abar».